


VELDEKE *J* bekèt

2e kwartaal 2019

Lentekriebels

VELDEKE bekèt,
Jaorgank 11, nummer 2

Daag van de Modertaal



Inhoud:

Waat gewaes is:

- Kersviering mit dialekmès
- Flitscursus
- Aester aovendj
- Jaorvergadering
- Daag van de Modertaal

Waat nog kömtj:

- Echter Dictee
- Declamatiewedstried
- Bezoek Echter Revue

En verder:

JAORVERSLAAG 2018

Volgendj nummer:

Kömtj oet in juni

Stökskes töt 15 mei

te sture nao:

Veldeke Krink Ech,

p/a Oleanderstraat 2,

6101 BX Ech, of:

tvanwegberg@ziggo.nl

Web-site:

Kiek op www.veldeke.net

väär Limburgs nuuts,

op www.veldekekrinkech.nl

väär alles van de Krink.

Op Facebook:

Veldeke Krink Ech

Nuuts en Activiteite van Veldeke Krink Ech



Cultuurhoes

Oze Veldekekrink is nao 'n óngerbraeking in verbandj mit de verboewing weer gevestigdj oppe baoveste verdeping van 't awd gemèndjehoes aan de Plats, noe "Cultuurhoes" geneumdj. 'n Paar m2 mer, mer vöörloipig genóg. De gebouwelike ómstandigheje zoewe 'n goje basis mótte kenne zeen vöör cultuur-utinge in oos gemèndje. Mit de hoesvesting van 't Museum van de Vrouw, mit de Stichting Edith Stein es internationaal studie- en trefpuntj en mit de nuje zaal, gecombineerdj mit grand café. Vööl is mäögelik.

Mer woor det eerder neet ouch al zo'n tieën jaore 't geval? Toen wore ouch nog de bibliotheek en 'n tiedlang 't vvv-informatiecentrum belangrieke partners. En toch... woor 't neet ech 't van activiteit broesendje cultuurcentrum det m'n vöör ouge haw. Ich kóm waal èns in plaatse in Twente, die van vergeliekbare ómvang zeen es Ech--Zöstere. Dao kèntj m'n 'n "kultuurhus". En det zeen geboewe vol activiteit, wo m'n gans d'n daag terech kan en altied waal get te doen is: vööl partners die minse trèkke, eder mit eige initiatieve, neet allein gerichtj op hun eige, mer aoep nao de gemeinsjap. Geit dit in oos cultuurhoes ouch kómme? Te haope is van waal, mer die doelstèlling zal gezamelik naogestreefdj, geïnspireerdj en aangestuurdj mótte waere. Dao is bie de realisatie van de verboewing nog te min aandacht vöör gewaesj. Veldeke zoe gaer zeen det de gemèndje en mit name de cultuurwèthaojer det puntj noe geit oppakke, zoadet "Aan de Plats" 't Cultuurhoes van 't centrum van Ech zal gaon waere.

Tót de Krink Ech behuere:

Aw Kirk, d'n Aosterberg, Baakhaove, Berkelieër, Brach, de Boesj, de Baek, Deetere, de Deelgaard, Ech, Echterbos, Gebrook, G'n Oea, 't Hènge, de Hei, Illikaove, Sint Joas, de Laak, Mariaveldj, de Nuijstads, Ophaove, Pej, Pötbrook, Roostere, Sjaelberg, de Slek, Spaanshuuske, Staeveswaert, Vèsserswaert, Zöstere en alles waat dao ómhaer liktj.

Sjpele

In de haof
 sjpeelt 't veurjaor
 sjtraolend en blie
 't lok mich nao boete
 mit zien sjaterende sjtum
 leut mich zeen
 wie 't klump
 in de tek
 en wie 't kruup
 euver de gróndj
 't sjpringk, 't zingk
 kleurt alles bóntj
 ónvermeujbaar en óngeremp
 duit 't doezjend dinger tegelik.
 Boete sjpeelt 't veurjaor
 en de waereld
 lik veur 'm aoep.

*Els Zeegers-Koelen,
 lid van de Sjrieverskrink*

Secretariaats-wissel

Op de op 13 februari j.l. gehaoje algemeen lejevergadering is 't secretariaat van Veldeke Krink Ech officieel äövergadrage van Miel Coenemans nao Magna Bedaf-Willems. Magna woontj op St.Joas en is dao bie gemeinsjap en verenigingslaeve betrokke. Veldeke dèntj in de persoan van Magna 'n kundig, betrokke en ouch jónger bestuurslid te höbbe gevónje. W'r wènze häör 'ne sjoane tied in 't bestuur van VKE.

Mit 't aantraeje van 'ne nuje secretaris numme w'r aafsied van Miel Coenemans, dae 8 jaor lank bestuurslid en secretaris is gewaes. Ruum oppertied haet Miel aangegaeve vöör 'n volgendje periode neet mieë besjikbaar te wille zeen, woor 't bestuur kós gaon oetkieke nao opvolging. Miel haet zien werk bie Veldeke altied good gedaon. Hae woor 'ne stipte secretaris dae de zake gaer tót in de puntje geregeldj haw. Bie zien besloet haet vöör 't streve nao verjónging bönne de krink en in 't bestuur 'n groate rol gespeeldj.

Aester Parade 2019

Ouch dit jaor weer woor 't bezeuk aan de Aesteraovendj vöör seniore vöör de leefhöbbers weer 'n geslaagdje activiteit. Rondj de 60 Veldeke-leje höbbe zich good vermaaktj mit de versjillende optraejes. Vanaaf 't begin leep alles vlot achterein in 'n gooj aafwisseling van artieste. Prissentatie in leech en geluid woor prima.

't Programma begós nao de verwelkómme en 't vöörstèlle van de nuje Prins Ramon I en 'n paar jubilarisse geliek good. De Jónges van de Zank in oetgebredje en verjóngdje (?) samestèlling wiste de sfeer good in te zètte. Wonao Henk Hover de nuje schlager van de Aester leet huere. Dae loog al gaw in 't gehuere en waerdje mitgezóng. Ouch zote weer twee bute in 't programma, die van d'n eine kantj get rös en van d'n angere kantj genóg te lache gove. De meziek en zangoptraejes wore zónger oetzunjerig van Limburgse top-artieste van de vastelaovendj: de Gelieënde en de groep Kartoesej oet 't zuje, Marleen Rutten en Ronald en Carien oet 't midde van de provincie. ('t noorde óntbrook dees kieër). Waat opvèltj, is det naeve de tempo-leedjes ouch 't loestere en de sfeer weer 'n plaats kriège. En det waerdje gewaardeerdj, want de zaal deej den weer good mit en aeve later ein en al loesterendje aandacht.

Det oos dialek de kern is van de vastelaovendj en mit vastelaovendj 't bès tót zien rech kómptj, is mit deze aovendj weer èns gebleke.

WAAT AL GEWAES IS



Lèste Kersviering in de Pejjerhaof

Zestig deilnummers aan de Kersviering 2018, wore ouch aanwezig in de dialectmès, die opgedrage waerdje door oos lid, Pestoar Bert Mom. Eder jaor weer wètj deze perfect dialect spraekendje pestoar ós mit te numme op waeg nao Kersmis. Same mit de parochiane van Pej woor de kirk good gevöldj en det droog bie aan de sfeer, dae muzikaal ingevöldj waerdje door Piet Aben en Thijs van Thoor..

De collecte in de mès hawwe w'r bestömdj vöör de kënjer van 't opvanghoes in Haïti, wo ouch Evena Kraanen en zien breurke vandaan kome. Evena wón dit jaor bie de Limburgse finale van de declamatiewedstried in Panninge mit zien gedich "Plat is 'n waereldtaal". Evena stool de herte van de minse in de zaal, mit häör perfect dialect en häör kluerrieke oetdossing. De leje van Veldeke höbbe ruumhertig biegedrage mit vööl briefkes oppe sjaol.

Nao de mès wore de leje oetgenuuedigdj in de zaal van de Pejjerhaof. Dit woor de lèste kieër det w'r Kersmis viere in de Pejjerhaof, ómdet per 1 jan 2019 deze zaal is opgegange in 't nuuj multi functioneel centrum Pey (MFC Pey). Sharon Smeets kreeg es dank, bie de aafsloeting van den aovendj, 'ne bos blome van de vöörzitter. De kersviering woor opgeboewdj oet meziek van Piet Aben en Thijs van Thoor en vöördrachte. 't Aete, det bestóng oet ruum voldoende, lekker hepkes, woor verzörgdj door eine van oos sponsors: Preuverie De Toren.

De muzikale biedrage van Piet en Thijs bestóng oet de themasong "Dimitri" van de gelieksnamige film en Amy, 'ne lerse song, bewirk-tj vöör bugel. Beide leefdesleedjes, mit 'ne knipoug van Piet aan Tiny, wie d'r zag! Eric van Hooy leet in zien vöördrach de echte deskundige oet de kersstal aan 't woord. Det wore dere mit minselike trèkke, die 't zelf allemaol hawwe mitgemaaktj in de stal! "Naoberse", oet eige werk van Mia van Wegberg leet ós kieke, wie Steina vreuger zelf häör bureruzies oplosjde en zörgdje vöör kers-vreej, zónger "de rijdende rechter" d'rbie te mótte haole. Ria Housmans wis ouch de volle aandacht te trèkke van de aanwezige , mit häör kersverhaal en -boadsjap.

't Waas weer 'n sjoan begin van de kersmis.

Flitscursus

De 2 aovendje "flitscursus" vöör de spelling van oos Limburgse taal op 11 en 25 januari j.l. zeen 'n succes gewore. Ze wore bedoeldj es opstepke nao 't kómmendje Echter Dictee, mer ouch gesjiktj vöör ederein dae zie of häör kènnis van de z.g. veldeke-spelling nog èns wildje opfrisje. En det bleke genóg minse te zeen! Versprèdj äöver 2 aovendje wore d'r ruum 40 deilnummers.

Noe blij 'ne flitscursus 'ne flitscursus: op eine aovend van 2 ½ tót 3 oer kan m'n neet alles doen waat nuuedig is óm altied good dialect te kènne sjrieve. Vöör korte oefeninge woor bv. geine tied. Det goof "meister" Piet Aben ouch al bie 't begin aan. Alle spellingsregels kome vöörbie: medeklinkers, klinkers, oetzunjeringe, werkwöörd enz. Mit inbegrip van 'n korte pauze woor de aovendj daomit good gevöldj.

Toch gove nao aafloop de cursiste aan det se de indrök hawwe d'r get aan gehadj te höbbe. Toch weer get opgestaoke, woor de conclusie. Of: noe begriep ich det toch get baeter. Te haope is det dit lètj tót mieë in 't Limburgs durve sjrieve; den geitj 't vanzelf stieëds baeter.



Wen de greuj

wen de greuj
 langsam en greun
 euver de waereld kruup
 veurjaor wintj
 van de wintjer
 blief mie duuster dinke
 achter
 wie e vergange slangevel
 wen ich dan
 de lieëuwerek huuer
 kin ich mit
 toet aan de ieëste hemel

Marleen Schmitz,
 Mofert, 2016

Jaorvergadering 2019

mit leef en leid

Aangenaam verrasj kome de ruum 60 leje van Veldeke de Fanfarezaal van Pey bönne. De zaal woor werm en gezellig aangeklèdj en keurig verzörgdj. Allein mit de geluidsinstallatie mótte w'r , wie gewuuenlik, nog effe oefene! Bie de äöpening brach de vöorzitter dank aan de fanfaar vöör 't moge gebroeke van de zaal hède hae de zenger Paul van Loo hertelik welkòm. 't Verslaag van de vöörige jaorvergadering , waerde mit ènkel klein aanpassinge vasgestèldj. En ouch 't door Anke vöörgelaeze jaoräöverzich 2018 kreeg 'n applaus.

Paul van Loo äöpende 't 1e muzikale blok mit zien eige kluuering van "'t Greun van 't graas", "Trök dènke aan vreuger" en " 't Is nog noats zoa dónker gewaes-". Bie de hervatting wore gein vraoge äöver de jaorraekening, wovan de kascontrole vanwaege overwachtje ziekte, nog zal plaats vènje en via de Nuutsbrief trök gekoppeldj zal waere nao de leje. De begrueting van 2019 leverdje ouch gein vraoge op en waerde vasgestèldj mit dank aan de penningmeister. De kascontrolecommissie van volgendj jaor zal bestaon oet Rebecca Wanders en Lies Gijzelaars. Vöör 2021 is Rose-Marie Linsen beschikbaar.

Paul van Loo vervolgte in 't 2e blok mit "Wètse nog wie sjoan 't woor?", 't vastelaovesleedje "Ich bön zoa einzaam en veul mich zoa verlaote" in oorspronkelijke versie en sloot aaf mit 't Zeuke van 'n maedje in d'n Aombusj, bie 't hertekamp in Haele.

Bie de aafsloeting van 't statutaire deil van de vergadering waerdje de bestuursleje Yvonne Smeets en Rinus Mulders herkaoze en Miel Coenemans es bestuurslid opgevolgdj door de vöörigestèldje kandidaat Magna Bedaf, die vanwaege 't äöverlieje van häör moder neet aanwezig kós zeen.

In de pauze waerdje – wie gebroekelik – door Geert Janssen foto's van de activiteite van 't aafgeloupe jaor geprojecteerdj, waat altied weer stóf tót kalle geuf. Daonao sprook de vöorzitter 'n waord bie 't aafsjeid van Miel, dae 8 jaor bestuurslid en sikkertaris is gewaes. Ton neumdje zien ingreuje in de Echter gemeinsjap in 't begin, 't op de achtergróndj sterk betrokke zeen bie alles waat Veldeke betruf, de verbènjing mit de anger kringe en de initiatieve vöör verjónjing van VKE. En noe, bie de aafsloeting van die periode, de good verloupe äöverdrach van take aan de nuje sikkertaris Magna. Mit 'ne sjoane bós blome en attentie waerde ouch Sonja in 't dankwoord betrókke. Miel op zien bäört brach dank aan alle leje, vöör hun betrokkenheid bie VKE-activiteite, memoereerdje de goje werksfeer in 't bestuur en de bezujer samewirking bönne 't dageliks bestuur, woa alles gezag wurtj waat nuuedig is, mit respect vöör ein en in vrundjsjap.

Bie 't 3e loesterblok van Paul van Loo woor volle aandacht vöör de leedjes van ziene lèste CD, mit graote deepgank: "Wie inne voeëgel", "De wóndere", "'t Is diene wunsj óm weg te gaon", "Miene èngel in d'n hieëmel", 't Koempel-leed "Wie sjoan woor mien landj vöör de kaole" en sloot aaf mit Toons "In 't graas van de wei" en toegift "Adieë mieng vrung".

Gans tevreje keke de aanwezige trök op 'ne sjoane aovendj mit leef en leid!



Literaire aovendj

Bie 't welkòm stóng de vöorzitter stil bie 't feit det Unesco 21 februari haet oetgerope es "**Daag van de modertaal**". Unesco wiltj mit dae jaarlikse daag aandacht vraoge vöör de 6000 tale die waereldwied nog gesproake waere, mer wovan bekans de helftj dreigtj oet te sterve. Zoa erg is 't mit oos Limburgs gelökkig nog neet gestèldj, mer 't is good óm d'rbie stil te staon, det 'n taal neet vanzelf blif bestaon. Es in 'n taal neet actief gesproake en gesjreve weurtj, is de kans groot det ze langzaam verdwientj. Op oos aovendje en bie oos activiteite perbere weer oos taal laevendj te haoje en alle facette d'rvan aan bod te laote kómme. In de vórm van toneel bievöörbeeldj.

In hun monologe lete Gerda Schatterjé en Rezie Vrancken huere en zeen wie se mit die taal kens spele, wërke óm alles oet te drökke waat se wils oetdrökke. In de ieëste monoloog door Gerda, waerdje 'n tedsbeeldj neergezatj waat hieël herkènbaar woor: ervaringe in de bewaarsjoal, de ieëste verleeftheid en de avonture in 't zwömbad. En wie 't enthousiasme äöver 't wenne van 't St.Jozefbeeldj kós ómslaon door de reactie van de mam.

't Blaoskwintet van de hermenie wisseldje sjoan aaf en zörgdje vöör 'ne stömmige en passendje äövergank, wonao Resie in de monoloog vanoet de wachkamer van de psycholoog häör frustratie es oppas-oma kwiet kós. Ónzekerheid, verwarring, en de vakterme bie de hulpverlening wore de bron van dit alles. Mer aan de basis loog die "baan" mit allerlei verplichtinge en opvoedregels, die häör eige dochter waal, mer oma neet verstóng.

Nao de pauze koom Gerda trök mit 'n langer stök wo ouch get mieë toneel bie koom kieke. 'n Komplex verhaol det zich gaondjewaegs óntwikeldje oet de döbberol van sjoan herinneringe aan jeugdsterre (wie Cliff Richard en stoer wielrenners), en aan lekker kaoke, en tegeliek de zörg vöör de ónzichbaar aanwezige man wo ze leef en leid mit gedeildj haw. Mer ze hawwe nog gein kènjer. 't Publiek woor aandachtig en volgdje moesstil. 't Waarderendj applaus aan 't ènj woor groot. 't Kwintet sloot hienao d'n aovendj aaf. D'r wore zoaget 80 bezoekers nao de Plats gekómme.

JAORÄÖVERZICH 2018

Veldeke Krink Ech

Väöraaf:

Volges 'n besloet van 2009, is 'n verkortj jaoräöverzich väörgelaeze in oos jaorvergadering.

De verslage van de aktiviteite höb g'r al in de koup van 't jaor in oos Veld(j)eke Bekèt kenne laeze en die aktiviteite zeen ouch in de fotoprissentatie van Geert Janssen tiedes de jaorvergadering weergegaeve.

In dit äöverzich van 2018 kömtj alles nog èns kort v'rbie, väör waerm d'r neet woor, en waem 't zelf nog 'ns wiltj laeze en mesjen beware.



't Bezoek aan oos aovendje blif constant, gemiddeldj zeen zo'n 50 - 60 leje aanwezig bie de aktiviteite. Bie speciaal aktiviteite is dit aantal bezoekers zelfs aanzienlik hoager.

Maondjelijke aktiviteite:

't Bezoek aan de seniorenparade van de vastelaovesvereniging "de Aester" in 't Royal Theater, woor oos ieëste activiteit op 10 januari. Ouch noe weer höbbe ruum 60 leje genaote van 'n good programma mit "dialect in al zien sjoanheid". De jaorvergadering op 21 februari waardje weer good bezóch. Nao de vaste óngerdeile woor 't aafsied van Riet Bougie--Jeuken es bestuurslid en penningmeister. Op väörstèl van 't bestuur besloot de vergadering Riet te beneume tót ieërelid van VKE. De aovendj waardje opgelooesterdj mit meziek en zang door Audrey Janssen mit begeleiding van Jos van Pol.

Op 9 mieërt hawwe w'r weer 'ne filmaovendj in Royal bioscoop. Nao óntvangst mit kóffie en vlaai, volgde de film "Nao 't Zuje" äöver de vastelaovendj in Venlo. D'r woor väöl waardering väör dees film. De "Literaire aovendj" op 21 mieërt waardje ingevöldj door de Zitterse sjrievers Lizette Colaris en Wim Kallen. Mit meziek door de kernformatie van Baroesjko, o.l.v. Mark Courage, ouch oet Zitterd. De Heemkundevereniging "Echter Landj" heel op 10 april 'n laezing äöver toponiemen, door dhr. Lou Giessen. In 't kader van de oetwisseling mit zöstervereniginge wore de Veldeke leje daobie weer oetgenuuedigdj.

Hienao volgde de periode van de declamatiewedstrieje: ieës in versjillendje sjoale, daonao de regio-finales in Pej en Zösteren en tenslotte de Limburgse finale in Panningen. 't Wore weer sjoan en väör de deilnummers spannendje daag, mit oeteindelik 'n prachtig resultaat: 2 provinciaal kampioene. Verderop in dit jaoräöverzich këntj g'r dao mieë äöver laeze. In zorgcentrum Vastrada in Zösteren woor op 9 mei 'ne gezellige väördrachte-middig, wo versjillendje kënjer ouch 'n biedrage aan höbbe geleverdj.

Dit jaor ging oos oetstepke op vriedig 29 juni nao de Vlaamse stad Leuven. W'r hawwe good waer en de stad woor gezellig mit genóg bezienswaardigheje, wo de gidse äöver kóste vertèlle. 't Bezoek aan 't awd universiteitshospitaal Histaruz woor 'n vermakelik stepke trök in de tied. Op 22 augustus heel Veldeke de veerdje poëziewanjeling, dit jaor in 't centrum van Ech. In 2 groepe lepe w'r langs bekëndje en minder bekëndje puntje en genote van de sjoan combinatie van väördrachte door o.a. minse van de Sjrieverskrink en van gevarieerdje meziek. De zomerse aovendj waardje aafgesloate op 't terras van cafe "de Witte" aan de Vriethaof. Zaoterdig 1 september haet Veldeke weer mitgedaon aan de dialekmès in 't paviljoen aan de kepel van Sjaelberg bie gelaegenheid van 't octaaf.

Op 19 september woor 'ne aovendj mit o.a. leedjes van Toon Hermans, gebrach door de zenger Math Dircks mit begeleiding door Ger Maessen. Deze aovendj in de Pejjerhaof waardje door bienao hónderd minse, leje en neet-leje, bezóch en gewaardeerdj. Bie de wanjel-excursie langs de Middelsgraaf op oetnuuediging van zöstervereniging "Pepijnslandj" op 29 september woor 't nog stieëds prachtig waer. Väöl leje van VKE lepe mit in dees interessante toch mit oetlèk door Harry van Buggenum.

24 Oktoaber hawwe w'r Evert Zits oet Zöstere es gast. Es persoan én in de film van Ton Vranken. 'ne Sjoane aovendj mit vöör vööl minse van boete Zöstere de ieëste kènnismaking mit deze beeldendj kunstnieër en sjriever. Van zien leedjes waerdje ènkele gezóngte door Jules Peters mit begeleiding door Ad Gijzels. 'n Activiteit, die nog op 'n laat moment in oos programma d'rtösse woor gepland, betróf 't bezeuk aan de musea in Wegberg-Beeck. Dao ging oze groep ieës nao 't museum mit volkstrachte, gecombineerdj mit biepassendje sierade. Vervolges, nao 'n lekker tas kóffie "mit kuchen" 't vlamuseum.



De streektaalfunctionaris van de provincie Limburg, Ton van de Wijngaard, koom op 21 november vertèlle äöver de Limburgse dialecte en alles waat daomit same hungtj. Det woor verhelderendj. Aafgeslaote mit 'ne kwis, wobie bleek det w'r good hawwe opgelètj!

Ouch dit verenigingsjaor weer aafgeslaote mit de kersviering, bestaondje oet 'n dialekmès m.m.v. pestoar Mom in de kèrk van Pej en aansloetendj 'ne gezellige kerstaovendj mit vöördrachte en meziek. 't Gebroekelike befèt woor vervange door versjillendje "klein" gerechtjes, die gesprèdj äöver de aovendj waerdje geserveerdj. Det veel letterlik en figuurlik good in de smaak.

Äöver al dees activiteite is oetveuriger te laeze in eerder nummers van 't Veld(je)ke Bekèt.

Echs	Romansje	Zaetere	Mierles
and	and	awé	and
kand	kand	kawé/kawe	kand
zaut	zaut (vero.)	zewé	zaut
votjer	taasje	vówe	votje
veej	foej	vóiv	vooj
kauf	kalt	kawé	kaaf
	kauf (vero.)		
woof	woof	woof	woof
(m.v. wuif)		woof (vero.)	
goud	goud	gouwe	goidj (vero.)

Vocalisering van l voor a/o + d/t (Bron: SGV 1914 / dialectwb.)



kruiden: sjurje	kussenloop: kusstreek	pinksteren: pinkste
lampen: week	leuken: leentake	populier: paepe/
leuken: leentake	meer: maerlink	redewisten: stachele
meer: maerlink	een middagduje diene: smijere	schade: sjiere
een middagduje diene: smijere	neut: ed. mv. ester	schaff: d. unjerled
neut: ed. mv. ester	nausdoek: hejjelek, manjplek,	streng (garen): stree
nausdoek: hejjelek, manjplek,	snorplek	tol betalen: barner betale
snorplek	swaer: dui: hilmmeiduu, spoe	twisten: toekke
swaer: dui: hilmmeiduu, spoe	ped: krodde	vaatloek: spjetelek
ped: krodde	pauze: dinst: Juddevis	verlooptje spelen: bergemenk
pauze: dinst: Juddevis	peluw: hupel	spele
peluw: hupel		vijver: wiejert
		vliager: windvogel
		vliender: roevogel
		vod: fiddel
		voopd: mamer
		zult: hultkies

"Typisch Echs" (Bron: SGV 1914)

Activiteite van de kènjer.

De Wèrkgroep Declamatie o.l.v. Piet Aben en Anke Heythuysen haet de wedstrieje in oze Krink weer vöörberèdj. Nao de prissentaties van de kènjer in de basissjoale, vónje in april twee drök bezóchte finales plaats in Ech en Zöstere. Zie vórme de basis vöör oos deilname aan en 't succes op de Limburgse Declamatie Finale. Bie die gelaegenheid waerdje in Zöstere, ómdet 't de 10e finale woor, 'n beukske mit gedichte aangebaowe aan de börgemeister. In Panninge hawwe w'r dit jaor weer twee wènnieërs: in groep 5/6 Evena Kraanen mit d'n 1e pries, en in de groep 7/8 kreeg Lieke Delissen d'n 1e pries. Dus Veleke Krink Ech ging mit 2 provinciale kampioene nao hoes. De kènjer die 't in de finales in Ech en Zöstere good hawwe gedaon, kóste later nog èns hun gedichte laote huuere op de vöördrachte middaag van zorgcentrum Vastrada.

Puntj van zörg weurtj bie de declamatiewedstrieje, det neet alle sjoale nog minse en of tied besjikbaar höbbe óm d'r in hun programma aandacht aan te sjènke.



Laeze en Sjrieve in oos Limburgse streektaal.

In 't naojaor 2017 / begin 2018 waerde geine kursus Laeze en Sjrieve gegaewe. Het ieëste Echter Dictee zal op 24 mieërt 2019 gehaoje waere in Cultuurhoes Aan de Plats 1 en is vööraafgegange door twee flitscursusse Laeze en Sjrieve, in januari van dit jaor.

Nuuj aktiviteite:

De nujer aktiviteite van de lèste jaore - de poëziewanjeling in 't Centrum van Ech en café Chantant mit Math Dircks en Ger Maessen - zeen in 2018 vervolgd. De poëziewanjeling woor jus wie anger jaore weer 'n succes, mede door de samewirking mit de Sjrieverskrink Midde Limburg, de passendje meziek. van Djemba, 't Koper Kwintet, Jan Pisters, Averegs, Peter Heynen en Ad Gijzels. De volgende poëzie wanjeling 2019 is in Nuujstadt.

Nuuj aktiviteite in 2018 wore: D'n dankaovendj vöör oos vriewilligers, wao 30 deilnömms mit plezeer op trök keke. 't Bezoek aan 't Flagmuseum in Wegberg mit bezunjere Schmuck. Biena 20 deilnömms wiste dit te waardere.



Publiciteit:

In 2018 haw oos Veldekebekèt zien tieënjaorig jubileum. Vöör de bezörging in Ech en Zöstere kóste w'r weer raekene op de groep van leje-bezörgers, die det al jaore doon, wovöör hertelike dank. Same mit de sponsore, Advocatenkantor Reijans, Blomesjop Bovendeerd, Oetvaartzörg Peusen, New Wave Engeneering, Advocaten Mulders, Dakdekkersbedrijf Pex, Preuverie d'n Tore, Plantencentrum Maessen en Rabobank Remunj-Ech zörge zie, det w'r oos kwartaal blaad kenne laote versjiene mit 12 pagina's per oetgave.

In 2018 wore d'r weer regelmatig publicaties äöver VKE aktiviteite in ónger angere 't "Waekblad" en in "Via Echt-Susteren". 't Radio 1 programma "Nieuws en Co" maakdje 'n opname.

Leje die hun mailadres höbbe doorgegaeve, kriege 'n paar kieër per jaor de digitale Nuuts-breve. Daomit kenne w'r uch aan de activiteite herinnere en verder actueel nuuts doorgaewe.

De website van Veldeke Krink Ech functioneert good. Ton van Wegberg en Jannie Simons zörge d'r vöör, det dao stieëds get nuuts op te zeen is.

Verder is Veldeke Krink Ech op Facebook te volge, mit berichte en soms gedichte.

De oetgaves: 't Bronsgreun Beukske, 't Kaokbook, de folders "Oos Plat liktj op de Straot" en de gedichtebundel bie 10 jaor Declamatie in Zöstere - zeen nog beperktj verkriegbaar oppe Veldeke aovendje..



Cultuurhoes Aan de Plats in Ech.

De officiële äöpening haet onlangs plaatsgevónje op 19 januari. Veldeke Krink Ech haet same mit de Heemkunde Vereniging het archief op de baoveste verdeping en is dao bereikbaar op daensdigmörge. Veldeke këntj same mit de Edith Stein Stichting gebroek make van de vergaderruimdje op de tweeëde verdeping. De groate zaal kënt gebroektj waere vöör bezunjere en mieë culturele aktiviteite van Veldeke Krink Ech.

Leef en Leid.

Weer hóbbe oos leje, Mevr. Cuypers, Dhr. Eussen, Dhr. Heijnders en Dhr. Kloth herdach in de Kersmès bie oos Kersviering 2018. Leje die 'ne tied krank zeen of get bezunjers te viere hóbbe, óntvange van Riet Bougie, names 't bestuur, 'n kaart mit 'n woord van aandacht.

Haodj ós hievan estebleef op de huuegte, zoadet nemes vergaete weurtj.

't Lejebestandj en 't lidmaatsjap van Veldeke Krink Ech

't Lidmaatsjap van Veldeke löp geliek mit 't kalenderjaor en is opzègkbaar vöör 'n nuuj kalenderjaor. Aanmelde kèntj gedurende het ganse jaor. De contributie in 2018 is neet verhuuegdj. In 2018 zeen 4 leje gestórve, 9 leje oetgesjreve es gevolg van laeftied of beperkinge of óm anger raeje. Verder zeen 7 nuuj leje aangemeldj.

Per 31 december 2018 haw Veldeke Krink Ech 243 leje.



't Bestuur

Oos bestuur bestuitj noe oet 7 bestuursleje en volduit daomit ruum aan de statutaire verplichtinge. D'r zeen nog 2 bestuursvacatures, waovöör w'r jónger leje zeuke, die oos bestuur kwalitatief op taalkundig gebied en/of bie digitale activiteite kènne versterke.

Activiteite van oos Provinciaal Bestuur Veldeke Limburg

De Kringekóntakdaag vöör bestuursleje van Veldeke, oet Belsj en Nederlands Limburg, is dit jaor georganiseerdj door de Krink Wieërtj.

'n Aafvaardiging van oos bestuur haet tweeë Algemein Vergaderinge van Veldeke Limburg biegewoondj in 2018. Die vergaderinge wore in de Oranjerie in Remunj.

De nuje vöörzitter en secretaris van Veldeke Limburg zeen vöörig jaor bie 'n rundje langs alle kringbesture, ouch bie 't bestuur van oze krink op bezeuk gewaes.

De vernujing die Veldeke Limburg wiltj inzette, via digitalisering en verjónging, haet vervolges hènj en veut gerkegrege op d'n "inspiratiedaag" op 4 januari 2019. De resultate daovan waere besprouke op de Algemein Vergadering in mei 2019 en daona äövergedrage aan het Provincie Bestuur van Limburg.



Sint Joep

't Is de grootste winkel
van 't zuje
Veur kènjer en veur mich
wie Sinterklaos
Dèks is 't drök,
me móts soms effe duje
Det maak niks oet, ich lach,
ich hób gein haos.

En sjiteit ouch nog
't zunke werm te sjtraole
Dan vuile veer
't veurjaor in oos lief
Me truf zich, lach,
me heurt verhaole
Gein minsj kik zoer,
gein minsj gedreeg zich sjtief.

Oet: Sint Joep,
van Phil Schaeken,
Zitterd

Ech, jaorvergadering 2018, februari 2019,
Ton van Wegberg, vöörzitter
Miel Coenemans, sikkertaris..

WAAT NOG KÓMME GEIT



1e Echter Dictee

Begintied is vervreugdj nao 13.30 oer !

Nao 'ne lange tied van vöörbereiding stuitj 't ieëste Echter Dictee d'r noe aan te kómme. Op zóndigmiddig 24 mieërt a.s. vanaaf 13.30 oer organisere w'r dit in de groate zaal van 't Cultuurhoes aan de Plats in Ech. Dit is mäögelik gewore mit de inzèt van 'n paar minse, die hieväör zeen gegange.

't Idee van 'n Echter Dictee is óntstange nao aafloop van 't Groat Limburgs Dictee, det vöörig jaor waerdje gehaoje op initiatief van dagblad de Limburger en Veldeke Limburg. Vanoet de Krink Ech bleek toen vööl belangstèlling hieväör te zeen. En oeteindelik wore d'r ouch bezunjer gooj resultate! Daobie is de situatie det al versjillendje anger plaatse en kringe zó n dictee kénne en det 't 'n gooj meneer kan zeen óm spelendjerwies - mer toch serieus - mit de spelling van 't eige dialek bezig te zeen. Alle raeje, dachte 'n paar minse, óm zo'n dictee ouch èns te probere. En zoa koom d'r 'ne wirkgroep.

Oet 'n groate hoeveelhaid van ideeë höbbe ze oeteindelik 'n konkreet plan 't leech doon zeen.

Mitdoon aan dit dictee kan nog en stuitj aope vöör ederein: inwoners van Ech-Zöstere, mer ouch anger belangstèllendje oet de regio en dao boete. Te dènke aan awd-inwoners of minse oet de regio. Waal zal 't Echter dialect es oetgangspuntj gelje: zinne waere in 't Echs vöörgelaeze en de jury hanteertj oos Brónsgreun Beukske, (editie Ech-Zöstere) es maatstaaf.

De titel "Echter Dictee" wiltj in eder geval neet aangaeve det allein Echtenieëre zoewe kénne insjrieve. Of wae allein Echs spruk. Ederein, kleine of groate leefhöbber van de Limburgse taal en van de spelling d'rvan kan mitdoon.

Bie 't mitdoon zeen d'r 2 mäögelikheje: deilnumme mit jurering. 't Dictee weurtj den nao 't sjrieve opgehaoldj en door de jury naogekeke. Dees deilnummers kómme in aanmerking vöör 'n 1e, 2e, 3e of 4e plaats. De oetslaag van de jury stuitj neet ter discussie.

Bie 't mitdoon zónger jurering kan ederein zelf zien of häör dictee naokieke aan de handj van de ónger de pauze geprojecteerdje gooj sjriefwieze.

Alle deilnummers, die zich höbbe aangemeldj, kriege nao aafloop 'n oorkonde. Degene mit de minste foute volges de jury, kan nao hoes gaon mit de Echter Krakeling-wisseltrofee en moog dem 'n jaor lank in bezit haoje.

De organiserendje wirkgroep van Veldeke Krink Ech haoptj det 't 'n gezellige wedstried zal waere ónger 't motto: "Wae sjriftj, dae bliftj". Aanmelje vöör 't Echter Dictee is nog mäögelik tót 17 mieërt. Det kan mit behulp van de link op oos website: www.veldekekrinkech.nl

En vergaertj neet: 't Echter Dictee zal ouch gewuuen 'n gezellige Veldeke activiteit waere, wo ouch ederein dae neet zelf mit duitj aevegood 'ne sjoane middig zal kénne belaeve: Kieke en genete van oos Limburgse taal!

Declamatie

Dit jaor ouch weer mit mitwèrking van basissjoale in de Gemèndje Ech-Zöstere is de Wirkgroep Declamatie van Veldeke Krink Ech de vöörbereiding begós, wodoor ze de jeugd kénne laote deilnumme aan de **Declamatie-wedstried 2019**. Wie g'r wètj, is gebroekelik det op sjoal en thoes de ieëste stappe waere gezatj vöör 'n gooj vöördracht. Det begintj mit 't oetzeuke van 'n gedich, det bie 't kèndj pastj. De kènjer kénne dus aan de slaag, al den neet get op waeg gehólpe door de lieëraar, door aojers of groataojers.

Wo sjoale 'n jaor neet de mäögelikheid zeen óm tied te staeke in de begeleiding van deze wedstried, perbere w'r det op te pakke same mit bv. de bibliotheek of 't gemeinsjapshoes. Dao liktj den ouch 'n book wo oet de kènjer hun gedich kénne keze. De gedichte zeen ingedeildj nao laeftied: de groepe 3 en 4, 5 en 6 en 7 en 8 vórme 'n categorie. Stieëds get moeiliker natuurlik. M'n kan ouch zelf – allein of mit (groat-) aojers - 'n gedich make en dit vöördrage. 't Is natuurlik waal sjoan 'n eige gedich te höbbe, mer ouch hie geltj: de vöördrach, dao geit 't óm.

't Is dit jaor vöör de 18e kieër det Veldeke Krink Ech de wedstried vöör de regio Ech organiseertj. (d.w.z. de sjoale in Ech, Pej, de Sleke, St.Joas, de Deelgaard en de Boesj). Vöör Zöstere e.o. (Zöstere, Roostere en de Nuujstadt) is 't de 12e kieër! W'r haope det ouch noe weer vööl kènjer mit zólle doon.

De ieëste regionale finale is dit jaor in Ech, op vriedigaovendj 12 april, vanaaf 19 oer in de Pejjerhaaf.

De finale vöör Zöstere volgtj 'n waek later op vriedigaovendj 19 april, vanaaf 19 oer in de Hermenie-zaal.

De wènnieërs in eder categorie kénne nao de provinciale finale. Die zal zeen op zaoterdigmiddig 25 mei in Panninge. Vöör verder informatie kan m'n terech bie Piet Aben, 0475-482146, of bie Patricia Beyer, tel.0475-485969.

Ech, ... opgehemeldj



Veldeke geitj weer nao de Echter Revue....

Net wie bie de vöörgeaonde edities bezeuke w'r es Veldeke Krink dit jaor de Echter Revue. Leje van Veldeke moge weer van de partie zeen bie 'n bezunjer oetveuring mit van alles d'rbie op **paoszóndig 21 april**.

Waal get anges es vöörgeaonde jaore: gein buffèt mieë; daovöör in de plaats waere hepkes en 'n drenkske gepresenteerdj. Net wie vöörgeaondj jaor op 'ne matinee-vöörstelling, omliesj mit 'ne hertelike óntvangs door 't revue-gezelsjap. En weer in 't speciaal vöör dees revue-oetveuringe aangeklèdje Euro-Detach theater op 't industrieterrein in Echt-Noord. De vaste bezeukers wete intösse det die hal is aangeklèdj en ingerich wie 'ne echte theaterzaal. Ouch det doon die vanne revue allemaol zelf. En det is den nog allein de boetekantj.

Nog wermere veultj de inzat van de deilnummers, alles bie ein waal zo'n hónderd, vöör of achter of rónjdóm 't toneel. Echter Revue stuitj gerant vöör 'n paar uurkes muzikaal bliespel, mit sjoane meziek, leedjes, kleijing en sjitterendje decors. Ouch de inhoud van "Ech...opgehemeldj" weurtj aangekondigd es anges es anges. 't Verhaol is 'ne doorein van fictie en feite en speeltj zich aaf tösse 1903 en 1985. Daonaeve is 't 'ne crimi mit misdaad en "slachtoffers". Bekèndje (Echter) locaties, situaties en persoane kómme d'r in vöör.

Waem dao haer wiltj, mótt oppertied d'rbie zeen en zich opgave wie oppe losse bielage besjreve is.

Weer zeen welkom bie "Ech, opgehemeldj" op zóndig 21 april, vanaaf 13.00 oer. (Wachte kan in de foyer. De zaal geitj aoep om 13.30 oer. Doertj al mit al tót taeg 17.30 oer.)



Oetstepke Voerstreek

't Jaorliks oetstepke van Veldeke Krink Ech geit dit jaor nao de Voerstreek in Belsj. Wie gebroekelik 'ne ganse daag, **van 09.00 tót 19.00 oer op vriedig 5 juli**. W'r höbbe 'n sjoan programma vöör dae daag in vöörbereiding, mit o.a. aankóms in 't bezeukerscentrum, 'n bezeuk aan de Abdij Val-Dieu en daonao de Com-manderij in St.Pieters-Voeren. In 't volgendje nummer kèntj g'r mieë hie äöver laeze.

Dao-in zitj den ouch 't briefke mit de gegaves óm uch op te gaeve. Det is den nog mer kort daag. Dus dèntj d'r vas äöver!

Excursie Kwekeriek

Dit betref 'n activiteit van de Natuurhistorische Vereniging "Pepijnsland", die in 't kader van oetwisseling teves aoep stuitj vöör leje van Veldeke en HKEL. 't Bezeuk vundj plaats op zaoterdig 25 mei. Tösse 9.30 - 10.00 oer is Inloup en óntvangst bie "t Gouden Kwekeriek" in Zöstere, mit infusie (kruiden-thee). Kènnismaking mit de locatie en gelaegeheid hie-äöver vraoge te stèlle.

Daonao van 10.00-10.45 oer is 'n prissentatie äöver voedselbosse en planne vöör 'n Voedselbos Haverland. Aansloetendj bezeuk aan 't voedselbos in wording mit korte pauze op de picknickplek. Ervaring oetwissele kan bie nog 'n teske kruiden-thee.

Adres van 't kwekeriek is: Hommelweg 1R, 6114 RR Susteren, op zaoterdig 25 mei.

Raar gezègdjes...

Det confetti weurtj oetgegoaidj op 'ne snipperdaag...

Nao 'ne druuege zomer kan de appelkweker mit de gebakke paere zitte...

Dae blènje dae 't neet zoog zitte...

Det 'n naas kan loupe en det veut ruke...

Det d'r eine slechter slechter kan zeen es d'n angere

Det mieë gezaegdj weurtj boete de tummermanswèrkplaats...

'n Waegske det doad löptj oppe kèrkhaof...

Hae zaag häör waal zitte mer zie zaag hem neet staon...

Allein de zón haet geine sjeem...

't Is good es se groat bös in klein dènger...

Inloup-oer oppe Plats

Edere ieëste daensdig van de maondje september t/m mei kèntj g'r inloupe bie Veldeke Krink Ech oppe Plats. In 't awd gemèndje-hoes op de bäöveste verdeping besjikke w'r äöver 'n eige aafdeilingske. Op die daag is 's mörges tösse 10 en 12 oer altied emes van 't bestuur aanwezig.

Veldeke besjikt dao ónger angere äöver 'n verzameling beuk van Limburgse sjrievers of beuk äöver Limburg.

Waem vraoge haet äöver oos taal of èns in die beuk wiltj naze, is op die daensdigge altied welkom. Gesjiktj es m'n get zeuktj: 'n gedich of verhaol bie ein of anger gelaegenheid. Ouch mit vraoge äöver oos dialek kèntj g'r terech. Of g'r kómtj gewuuen óm get te vraoge, get te vertèlle of te brènge waat w'r dao mesjien kènne gebroeke

De nog volgendje datums zeen: 5 febr., 12 mieërt, 2 april, 7 mei en 4 juni 2019 Nao de vakantie gaon w'r den daomit verder..

Zöstervereniginge

Heemkundevereniging "Echter Landj":

* Daensdig 9 april, 20.00 oer: Laezing door Theo Savelkoul äöver de DDR. in Buurthoes St.Joris,Cypresstraat

* Daensdig 7 mei, 20.00 oer: Laezing door Kees Hessels äöver 't kestieël Schaesberg in Buurthoes St.Joris,Cypresstraat (mit excursie op zaoterdig 22 juni)

Verder info: www.echterlandj.nl

Natuur Historische Vereniging "Pepijnsland":

* Daensdig 19 mieërt, 20.00 oer Jaorvergadering, aansloetendj: Laezing door Math de Ponti: "Natuur voor elkaar" Jeugdhoes Pius X, Mussenstraat 6

* Zaoterdig 25 mei Excursie Kwekeriek inloup: 9.30-10.00 oer Ouch vöör de leje van Veldeke en van HVEL. (info in dit blaad)

Verder info: www.pepijnsland.nl

Vereniging v.Natuurvrienden Zöstere:

* Dónderdig 17 april, 19.30 oer Jaorvergadering in Vastrada, Zöstere

* Dónderdig 23 mei Bösreis nao Bastogne nader info t.z.t.: www.natuurvriendensusteren.nl

Alle aovendje zeen toegankelijk. Es g'r neet lid zeentj vraoge de zöstervereniginge 'ne kleine entree, net wie weer det door bie neet-leje.

ADVOCATENKANTOOR **Reijans**

Maak gerös 'n aanspraak. 't ieëste gesprek is altied vrieblievendj en kosteloos!

Mr. E.H.C.K. Reijans
Advocaat

Molenstraat 3a
6101 CW ECHT

T: 0479 40 15 22
I: www.reijans.nl

**Blaemeshop
Bovend'eerdt**

Kreyerstraat 6
6101 CL Echt
tel: (+31) 475 486407
email: bloemeshop@xs4all.nl

Limburgse grootste keus
in tuinplanten en bomen

Rijksweg Zuid 23 Echt
0475-481293
www.limburgplant.nl

Peusen Uitvaartzorg

'n Aafsied
same belaeve

Tel.: 0475 - 48 61 00

Bellekeweg 37 Echt
Kloosterstraat 9 Susteren
info@peusen.nl | www.peusen.nl

**NEWAVE
ENGINEERING**

VERTROUW IN OPLOSSINGEN

Postbus 1, 6100 AA Echt
T +31 (0)475 - 419 419
F +31 (0)475 - 486 474

Houtstraat 56, Echt
Akerstraat 157, Kerkrade
www.mulders-advocaten.nl

**MULDERS
ADVOCATEN**

VERTROUW IN OPLOSSINGEN

Postbus 1, 6100 AA Echt
T +31 (0)475 - 419 419
F +31 (0)475 - 486 474

Houtstraat 56, Echt
Akerstraat 157, Kerkrade
www.mulders-advocaten.nl

**Paula Cox
'Mooi Wonen'**

De verkoop van je woning, van start tot eind geregeld.

Betrokken, creatief en betrouwbaar makelen met kennis van uw regio.

+31 (0)6-547 970 47
www.pcwv.nl

PRETORIEN

7 dagen per week geopend

Houtstraat 15
0475 - 48 25 45
www.pretorien.nl

Rabobank



Indien onbestelbaar: Oleanderstraat 2 6101 BX Echt

Krink Ech

JAORPROGRAMMA 2019

Activiteite, die al gewaesj zeen:

- 11 en 25-01 **Flitscursus Echs,**
- 15-01 **Laezing äöver 't hoesslachte,** door Hub Lacroix
Samewèrkingsactiviteit van de Heemkundekring "Echter Landj"
- 30-01 **Dialek in al zien sjoanheid:**
Op bezoek bie de Bóntje Aovendj vanne Aester.
- 13-02 **Aangeklèdje Jaorvergadering**
Mit kóffie, vlaai, fotopresentatie en meziek
- 21-02 **Daag van de Modertaal: 3 monologe en meziek**

De bönnekort kómmendje activiteite staon besjreve in dit nummer:

- 24-03 **Echter Dictee**
Op zóndigmiddig van 13.30 - 16.30 oer.
Zaal Cultuurhoes de Plats, Ech.
- 12-04 **18e Finale Declamatiewedstried vöör de jeug van Ech e.o.**
Pejjerhaof, vriedigaovendj óm 19.00 oer.
- 19-04 **12e Finale Declamatiewedstried vöör de jeug van Zöstere e.o.**
Hermeniezaal, op vriedigaovendj óm 19.00 oer
- 21-04 **Ech....Opgehemeldj.**
Bezoek aan de speciaal vöörstelling van de Echter Revue
Euro Detach theater, Ech; zaal aoep vanaaf 13.00 oer
- 25-05 **Wanjeling/bezoek Kwekeriek - plöktuin, in Zöstere**
Samewèrkingsactiviteit van de Nat.Hist.Vereniging "Pepijnslandj"
vanaaf 09.30 oer
- 26-06 **Limburgse spellings-app,**
Achtergróndj, oetlèk en instructie door Yuri Michielsen
Pejjerhaof, op woonsdig óm 20.00 oer
- 05-07 **Jaorliks oetstepke.**
Dit jaor nao de Voerstreek in Belsj.
Bös vertrèktj vanaaf de Nuuj Mert óm 09.00 oer
- 21-08 **Poëzie-wanjeling**
Mit meziek en vöördrachte, dees kieër oppe Nuujstadt.
- 07-09 **Dialek-mès bie de kepel op Sjaelberg.**
Bie gelaegenheid van de Maria-oktaaf
- 20-09 **"Limburgs preuve"**
aovendj äöver en mit streekprodukte.
Pejjerhaof, op vriedig (!) óm 20.00 oer.
- 17-10 **S(j)terre S(j)traole - 5**
Aovendj mit meziek, zang en vöördrachte.
Hermeniezaal, Zöstere, op dónderdig
- 20-11 **Echter krakelinge en vuurstein.**
Informatie äöver dees typisch Echter lekkernieje.
Pejjerhaof, op woonsdig óm 20.00 oer.
- 20-12 **Kersaovendj**
Fieëstelike vriedigaovend mit dialekmès en diner.
Kèrk Pej óm 19.00 oer en aansloetendj in de Pejjerhaof.

Kringbestuur

Vöörzitter:
Dhr. A. (Ton) van Wegberg
Oleanderstraat 2
6101 BX Echt
0475 48 21 49

Secretaris:
Mw. M. (Magna) Bedaf-Willems
Zwaluwstraat 4
6111 AV St.Joost
06 10 86 17 10
info@veldekekrinkech.nl

Penningmeester:
Dhr. Th. (Theo) Bougie
Thaalpad 129
6102 EH Pey
0475 41 11 69
IBAN: NL 65 RABO 0138 6319 64

Bestuursleje:
Dhr. P. (Piet) Aben
Schilbergerstraat 4
6102 AJ Pey
0475 48 21 46

Mw.A.(Anke) Heythuysen-Corstjens
Houtstraat 80
6102 BK Pey
06 30308494

Dhr. R.(Rinus) Mulders
Rozenlaan 22
B-3930 Achel (B)
0032 489 00 83 03

Mw. Y. (Yvonne) Smeets
Wilhelminaplein 4a
6097 AT Heel
0475 57 20 06

Foto's in dit nummer zeen van Geert Janssen, Ed Cremers en Ton Vranken.
Eur lidnummer stuitj hie baove, baove 't adres. Gaer te vermeldje bie opgaves en betalinge.